

san 14 nan - № 151/159
ékutéburu kale - san 1986
BP 24 - Bamako (Mali)
téléfón: 22-21-04/CCP : 0155
doromé 5

Kibarudilannaw kuntigi amadu ganyi Kante

kibaru

a be be kale o kalo Mali kunnafoniso AMAP ka yamaruya kono

Mali ka yèrèta san 26 nan kèra hakilisòrò kònò

San 1986, sètanburu kalo tile 22, Mali ka yèrèta san 26 nan kumbènna ni gintanbay ye jamana fan tan ni naaci bëe la. O gintan minnu bëe tali kè taamasen kura donni na, jamana denw ka dinyèlatigè la, sòro ni hadamadenya hukuru kònò, pèresidan Musa TARAVELE k'o ye fèn ye, min b'an wajibiya, k'an ka kelenw ni kètaw fèsè-fèsè, k'an hakilijakab'u kan.

O de kòsòn, sètanburu kalo tile 21 su k'a duguje a tile 22 la, pariti "UDPM" Sakeretèri Zeneralni ni jamana kuntigi pèresidan Musa TARAVELE ye jèmukan nafama da jama tulio kan, hakilijakab'o siratigè la.

Mali ka yèrèta san 26 nan gintan bonyara cogo min na Bamako, a bonyara o cogo kelen na an ka jamana mava 7 kelen -kelen bëe kònò.

K'a daminè Kidira fo Ansongo, foyi tè yen, mintora këbali ye: mónyentugu defilew, donsorw ka tulorw ani fèn ceman wèrèw, minnu bëe ye malidenw danbefènw ye.

dannaya minèn fara

I n'a fò pariti ni góférènama y'a kanu cogo min, k'o nyin'an fè ko gèlèya n'a toa bëe an man kan k'an ka hòrònya falen foyi la. Malidenw y'u hakili-

kab'o o kuma de kan, k'a dòn ko tinyè man kòrò a ye, o kò k'a waleya n'u boli ye donba in nyénajè kènew kan i ko ntònw.

Sanji ye nèema min lase hadanedenw ni baganw ni sènèfènw ma nyinan, o h'ia fè ka k'an bolo jigituguko ye, ni Alay'en kisi ntònw ni kònò ni sumantinyè fènyènama wèrèw masibaw ma, minnu bëe k'an ka sènèfènw nyogòri.

O n'a taa bëe, an jigi ma kari, bawo an ma fò an teri lakikaw ka dèmè la kabini ja kér'an ni sahelijamana tòw siginyögòn ye, a bëe san 10 ni kò bò.



baganw

cikèla ka kan k'i jija sènèkèmisi balo cogo nyuman na tuma bée.
n'o tè, bagan fanga bè dôgôya,
a tèna se ka baara gèlèn kè.

bagan balo suguya

bagan ka balofèn

a dagalen don, bagan ka balo ka falen falen. o la sa, balo dafalen bè di bagan ma don o don, i n'a fô, suman kisè, kòorikolo bo, kòorikolo bo dilannen. balo nyagamaw fana bè di bagan ma don o don, i n'a fô, shòkalaw, tiga nyagaw, bin kènè, bin jalan, bin kènè tigèlen maralen.

kògô jòyòrò

sanga ni waati bée, kògô jòyòrò ka bon misiw ka kènèya la : kògô dòonin bè se ka kè baganw ka balo la, walasa k'a diya u da.

nka, a ka kan, misikògô fana ka di u ma, k'a d'a kan, nafama fèn caman b'o la : o bè kè sababu ye, balo yèlèma cogo bè nògôya u kònò.

minni ji

misi mago bè ji minta la ; an hakili kana bò ka ji nyuman di misiw ma.

o ji minta hakè bè se ka kè litiri mugan ye, fo ka taa se litiri biduuru ma tile kelen kònò. o jate bè sòrò misi kundama fè, ani a ka baara kelen, ani san waati.

an kana sòn ka ji di sènèkè misi dumunikèbali ma, walima a bôlen kura baaraba kè yòrò la : aw bè a ladumuni fòlò, ka sòrò, ka ji di a ma. o b'a kisi kônôdimi misènw ma.

balo di cogo n'a waati

bagan balo kana fin, a kana nôgô, a kana toli, walima a kana tinyè cogoya wèrè la.

balo ka kan ka di baganw ma minèn kònò, wa-

lasa k'a tinyèli bali, ani k'a saniya sabati.

a ka kan, balo ka di baganw ma sinyè caman tile kònò :

- fòlò : sògôma, sanni u ka taa sènèkè yòrò la.
- filanan : tilegan fè, lafinyè bò waati.
- sabanan : wula fè, u bôlen kò sènèkè yòrò la.

balo hakè

balo hakè bè jateminè balo fanga de fè, ani bagan girinya.

balo fanga hakè dònni :

an bée y'a dòn ko dumunifèn bée nafa tè kelen ye. kodònnaw ye dumunifèn kelen kelen nafa lajè, ka cogo sòrò, min b'a to, balo fanga hakè bè se ka suma : u ka jateminè sen fè, u ye malo kisè lajè fòlò, k'a fanga hakè dòn, k'a ni balo tòw fanga sanga nyògòn ma.

o la, n'i ye malo kisè kilo kelen fanga hakè kè 10 ye, bagan ka dumunifèn dòw kilo kelen fanga hakè filè nin ye :

- keninge kisè fanga hakè ye 9 ye ;
- sanyò kisè fanga hakè ye 7 ye ;
- kaba kisè fanga hakè ye 11 ye ;
- kòorikolo fanga hakè ye 11 ye ;
- kòorikolo bo fanga hakè ye 6 ye ;
- shòkala fanga hakè ye 6 ye ;
- tiga nyaga fanga hakè ye 5 ye ;
- malo kala fanga hakè ye 2 ye ;
- bin kènè tigèlen maralen nyuman fanga hakè ye 3 ye ;
- bin jalan fanga hakè ye 2 ye.

bagan girinya :

misi mana bonya, o dumuni hakè fana bè caya.

ladon cogo

o jateminè cogo filè nin ye, min bè dumuni dunta fanga hakè jira tile kelen kònò :

- ni misi girinya ye kilo 200 ye,
o balo fanga hakè bè bèn 19 ma;
- ni misi girinya ye kilo 250 ye,
o balo fanga hakè bè bèn 23 ma ;
- ni misi girinya ye kilo 300 ye,
o balo fanga hakè bè bèn 26 ma ;
- ni misi girinya ye kilo 350 ye,
o balo fanga hakè bè bèn 29 ma ;
- ni misi girinya ye kilo 400 ye,
o balo fanga hakè bè bèn 32 ma ;
- ni misi girinya ye kilo 450 ye,
o balo fanga hakè bè bèn 35 ma ;
- ni misi girinya ye kilo 500 ye,
o balo fanga hakè bè bèn 38 ma.

Mali woroduguyanfan ntura (n'o bè wele "mere woloso"), o girinya bè kilo 250 ni kilo 300 cè. gònganganw b'a ta kilo 300 fo kilo 400.

jateminè fòlen ninnu ye dumuni fanga hakè ye, min bè bagan nafa tile kelen kònò, min ka kan ka dj a ma, hali n'a tè baara la. ni bagan bè baara la, dò bè fara o kan, k'a kè o nyôgôñ fila ye.

misali :

mere woloso mana kè i bolo, min girinya ye kilo 300 ye, n'a tè baara la, dumuni bè di a ma, min fanga hakè bè bèn 26 ma. n'a bilala baara gèlèn na don min na, min bè di a ma, o fanga hakè ka kan ka bèn 26 sigiyòròma 2 ma, n'o ye 52 ye.

o balo fanga hakè sòrò cogo ka ca. i b'i hakili to a la ko dumuni ka kan ka falen falen tuma bè. o la, i bè se ka min di misi ma o don, o dò filè nin ye :

dumuni min bè di	o fanga hakè
bin jalan	kilo 10
tiga nyaga	kilo 2
kòorikolo	kilo 2
<hr/>	
o bée lajèlen	kilo 14

52



walima, i bè se k'a kè nin cogo la :

dumuni min bè di	o fanga hakè
bin kènè maralen	kilo 7
malokala	kilo 4
shòkala	kilo 2
kòorikolo bo	kilo 2
<hr/>	
o bée lajèlen	kilo 15

53

bin kènè tigèlen maralen

walasa ka bin nyuman mara k'a nyè, i ka kan k'a tigè sanni a ka wolo, k'a sòrò, samiyè ji banna : o b'a kisi tolili ma, ani k'a jali nògòya.

kungo kònò bin caman bè wolo, k'a sòrò, samiyè ji ma tigè. o b'a bali ka bin kènè nyuman sòrò marali kama. o la, bin suguya minnu ye bin marata nyuman ye, o ye binw ye, minnu tè wolo joona.

tali kèra kòorisènè baarada ka gafe dò la
ka kibaru nyè fila ninnu dilan.

kibaru kanubagaw kuma yòrò

Baa ni

nin tun ye terikè fila ye, Siriman ani-Baa. Siriman ye denkè kelen sòrò, o tògò tun ye ko "Nekeson".

*
**

ala y'a kè, Siriman banana, o bana mèenna kosèbè. kabini Siriman y'a dòn ko a tè bò bana na, a ye a terikè Baa wele, an'a yèrè denkè Nekeson. a y'u lasigi, k'a fô Baa ye :

- "ne b'a dòn ko ne tè bò nin bana na. o kama, ne ye Nekeson kalifa i mà. Baa, i b'lì jija k'a minè i ko i yèrè den. Baa, i den, ani ne den, a bée kelen."

Siriman ko : "Nekeson, i bée Baa dòn i fa ye, i bée to ka taa Baa fè yen, a bée to ka mógo-kò-ròba kuma dòw fò i ye."

Baa ni Nekeson bée ko :
- "Siriman, an y'a mèn."

kabi Siriman ye nin fò, Nekeson siranna, a jòrèla, a jigi latigèra, a kasira.

Siriman nana sa. Siriman salen kò fè, sanu kuru saba tun bée a fè yen. Baa tun y'a dòn ko sanu kuru saba nin bée Siriman fè.

*
**

kabini Siriman sara; a denkè Nekeson tun bée to ka taa Baa bara tuma o tuma. don dò, Baa y'i kan to Nekeson ma :


- "ne b'a fè ka mógo kòrò kan dòw fò i ye. nka, kuma nin kelen kelen bée bée sara."

Nekeson ye Baa nyininka :

- "o kumaw bée sara cogo di ?"
Baa ko :

- "kumakan kelen o kumakan kelen, o bée sara sanu kuru kelen."

Baa ye Nekeson nyininka : "e bée se kumakan joli la ?"



ka Nekeson jan to a fa Siriman ka sanu kuru saba la, a y'i kan to :

- "kumakan saba de se bée ne ye."

o dùgùjè, Baa ko Nekeson ma :

- "sini, i bée na ni i ka sanu kuru saba ye."

Baa ye waati min fò Nekeson ye, o selen, Nekeson ni sanuw nana. Baa y'i kan to Nekeson ma :

- "i labèn, n bèna i ka kumakan saba fò i ye. kuma fòlò, n' den Nekeson, mógo nyènafèn ani i nafa fèn tè kelen ye."

Nekeson ye a bolo bila a ka jufa rò, ka sanu kuru kelen bò k'a di Baa ma.

- "kumakan filanan : denkènin n'a sunogòba man nyi ka i to dunanya na."

Nekeson ye sanu kuru filanan bò k'a di Baa ma.

Baa ko :

- "Nekeson, i ka kumakan sabanani ani a laban filè nin ye : mógo nò tè ko min ye, i kana jòrè o la."

Nekeson ye sanu kuru tò ke-

len di Baa ma. nka, Nekeson ye kuma saba nin to a kònò, i ko kilisi.

*
**

san dò nana kè, kóngòba nana bin u ka dugu kan. dugu mógo-w tila bée bolila. don dò, Baa ye i kan to Nekeson ma :

- "sini, ne yèrè b'a fè ka boli ka taa yòrò dò la, ka suman sòrò n ka ga ye."

Nekeson ko Baa ma ko ale bée taa o fè. Baa ko :

- "baasi tè."

*
**

dugu jèra, Baa ni Nekeson ye u ka minènw siri, ka sira minè. u sera wulaba dò la, su kora k'u to yen. Baa ni Nekeson y'u da jiri sunba dò jukòrò.

su kolen, jinècè dò jiginna ka bò jiriba nin san fè, ani muso fila. jinècè nin ko Baa ani Nekeson ma :

- "ne bène fèn fila jira aw la.

Nekeson

ni mògô min y'a si dòn, ne bë dinyè fèn bée dò di o ma."

Baa ni Nekeson sònnna o ma. jinècè nin ye muso fila lajò u nyè kòrò. muso kelen cè ka nyi kosèbè ; nka, den tè a fè. muso filan, o cè ka jugu fo k'a dama tèmè, kúru kuru bë a farikolo fan bée la ; nka, denw caman bë o fè. jinècè ko Baa ma :

- "nin bë lakali cogo di ?"

Baa y'a kònò miiri miiri, a ko jinècè ma :

- "ne tè nin si dòn."

kabini jinècè ye nin muso fila lajò, Nekeson hakili jiginna Baa ka kuma kelen na. jinècè ye Nekeson fana nyininka, Nekeson ko :

- "ne ye denmisèn ye. nka, ne bëna ne hakilinata fò. ne Nekeson ka miiri la, a bë fò o ma : mògô nyènafèn tè i nafa fèn ye."

jinècè ko :

- "o yèrè don."

jinècè ye misi caman, ba caman, shè caman, saga caman, sangu caman, dinyè fèn bée caman di Nekeson ma. nka, Nekeson ma sòn juguya ma Baa la. a ye fèn ninnu tila u fila ni nyògòn cè. kabini u ye nin fèn wôrò, Baa y'a kan to Nekeson ma :

- "an tè segin so sa ?"

Nekeson y'a jaabi :

- "o bë se ka kè."

*
* *

Baa ni Nekeson segintòla, u sera dugu dò ma. su kora k'u to o dugu rò. u sira cè dò ka so. Baa ni Nekeson bëna u da tuma min, Nekeson hakili jiginna Baa ka kuma kelen na, ko dunankènin n'a sunògòba man nyi. nka, Baa yèrè hakili ma o ye. Baa sunògòra ; nka, Nekeson ma sunògò.

su kòròbayalen, cè dò ye yè-

lènyèlènnan ta, k'o da kogo la, ka don du kònò. cè nin taara dutigi muso ka so kònò. jaa, o tun ye dutigi muso kamalen ye. muso ni cè mèenna baro la, Nekeson tulo bë olu bée la. cè ko mu-

so ma :

- "ne bëna i cè faga, de ka i furu siri."

muso ko :

- "i tè taa a faga su in na ? n'o kèra, dunan dòw bë yan, ne b'a fò ko olu nò don."

muso kamalen wulila, ka muruba ta, ka taa muso cè kun tigè a ka so kònò. a tilalen cè kun tigèli la, a nana muso ka so kònò, de k'i kan to :

- "ne y'a faga."

Nekeson ye nin bëe mèn. dugu bëna jè tuma min na, muso ko cè ma :

- "i don ne ka bondon kònò, de ka o datugu i la."

*
* *

dugu jètòla, muso ye ji kala-ya, ka taa a cè ka so dayèlè, ka o ye. a kulera, ka jamaw wele ko dò ye ale cè faga. a bë kasi, a bë i bin dugu ma. jama bëe na-na. muso nin y'i kan to ko :

- "dunankè fila minnu sira yan," ko : "olu nò don."

o kuma taalen fò dugutigi ye, o ye mògô bila ka taa dunankè fila nin nò fè. dugutigi y'i kan to u ma :

- "aw ye aw jatigikè faga, aw yèrè bëna faga a nyògòn ye."

*
* *

o yòrò la, Baa kasira. nka, Nekeson hakili jiginna Baa ka kuma sabanan na, ko mògô nò tè ko min ye, i kana jòrè o la. Baa bë kasi cogo min, o bë kasi o cogo la. Baa y'i kan to Nekeson

ma :

- "Nekeson, mògô min mana se ka ne bò fagali la, ne bë n ka fèn bée di o ma."

Nekeson ko Baa ma :

- "i dade. ala mana an kè cogo min, o don."

Nekeson ko : "an bë fò nin na, an tè faga a kelen na."

Baa y'a jaabi :

- "ni an ma faga, jinèkè ye fènw min di an ma, ne bë n ta bée di i ma."

*
* *

dugu mògòw ye Baa ani Nekeson minè tuma min, ko u bëna faga, Nekeson ko :

- "a' ye a' jò, ne bëna kuma. anw ma cè nin faga. nka, muso kamalen ye cè nin faga. nka, ni aw ma da a la, a' ye mògô kelen bila ka taa muso ka so kònò, a ka bondon kònò lajè. fèn min bë yen, a' bë na o fò ne ye."

o yòrò la, kamalen kòrò cè fila taara o lajè. olu taara a sòrò, cè nin ni muruba jolima sigilen bë bondon kònò. u y'a minè, ka taa n'a ye dugutigi fè yen.

o yòrò la, Nekeson ye kuma bëna lakali cè yèrè nyè na. o kelen, Baa ni Nekeson kisira fagali ma.


Baa ye a ka fèn bëe di Nekeson ma. Nekeson nana kè fèntigiba ye, Baa kèra sègènbagatò ye. Baa ni Nekeson taara u ka so o cogo la.

*
* *

n badenw, a' ye a lajè. jòn bëe n'a dakon don ala fè. Baa tun b'a fè ka Nekeson kè sègènbagatò ye ; nka, ala ma sòn o ma: a' ye maa ka juguya dabila.

Jawoyi Bilèzi Jara
Kèfabugu

musow ka bònògòla sira dò ye balikukan ye



Mali kono, musow ka kalan bë jyòròba la, bawo mógo këmè o këmè la, bi duuru ni kelen ye muso ye jamana kono. Wa muso këmè o këmè la fana, duuru dòron de bë taa balikukan so la. Mun dun b'u bali kalan na?

- U ka baara ka ca kojugu; elu de bë ji ta, ka taa dògo nyini, ka tobili kë, ka tila ka taa foro la.
- Muso ka dògo u la min bë se ka tòw lakalan. A ka ca a la, npogotigiw de y'u karamégow ye; olu dun mana furu u bë taa u cèla la.
- Kalan min bë kë u kun, o t'u kunkankow nyènabò.
- Denmisènw ka baara b'u bali kalan na ani u yèrè ka banaw.
- cèw fana tè són u musow ni cè wèrèw ka dorogo kalanow la.

Musow ka baara caya in t'a bali u ka kë bolokofè-mögòw ye. Olu de niyérò ka dògo dinyèlatigè nafaw la: u tè kalan bë sòrla, u furakèyòròw ka dògo, sòrla bë t'u ye fana.

Mun nana n'o ye? U bë baara min kë o jyòrò de ka dògo mögòw nyékòrò. Saratè u ka baara la, hali walenyumandòn t'a la. Nka den o den dò de bë fara musew ka baara kan.

Nin bëe de kôson Mali musow ye nyögón dalajètonba kono n'o ye "UNFM" ye, walasa ka feerè nyini u haminankow la. Musow ka

nin cèsiri ni faantankulu ka cèsiri de ye kelen ye.

Kabini sisan, an be se k'a fò ko musow ye sira sòrla ka nyètaa la u yèrè ye, mógo wèrè sima sira min don u kòrla u yèrè ka cèsiri kò. O de kama musow ka balikukan ka kan ka kë kalan ye min b'u ni cèw damakènyè faso baara la, balikukan ciyakèda kunitigiba Berehima DUNBIYA ka fòli la.

O la sa, an ka sisan balikukan feerèw b'a nyini

ka musow ka fènsòrlòsiraw de yiriwa ani k'u senden jamana kunkow bëe la. O de kama balikukan ka kan ka kë sababu ye ka musow dege u ka se k'u yèrè ta sòrla fan fè.

Jamana ka nyètaa tè taa musow kò, bawo ni kalan bë sòrlò yiriwa, ka nyètaa sabati, n'i ye muso kelen kalan, o h'i n'a fò i ye du kelen ani jamana kelen mumè bëe kalan, k'u ka bònògòla nògòya.

"UNJM" ka Sufurulayi yèrèdòn baara

Mali funankèninw ka jekulu "UNJM" y'a ka yèrèdòn baara kunfilanan min daminè Sufurulayi Moti mara kono, san 1986 uti kalo tile 26, o baara kuncèra sètanburu kalo tile 20 Bakari TARAWELE ka nyémögòya kono, n'o ye Mali fari-kolonyènajèkow ni seko ni dònkok minisiri ye.

Moti mara fangaso nyémögòw ni mógo ba caman wèrè ye, kënè in sankòròta n'u yeli y'a yòrò la, sanko Amadu Dawuda JALO, n'o ye "UNJM" sekretèri zenerali ye.

"UNJM" sekretèri zenerali Amadu Dawuda JALO y'a kannabò jama ma. A ko, nin y'a san filanan ye, Mali fan tan ni naani denmisènw bëe ka nyögón sòrla Sufurulayi, ka funankèninw tògòla soba jò, n'o ye kan ye, min bëna to yen kudayi.

A ko, kan in jòli bë Mali denmisènw nkaniya jira, u jigi dali la u yèrè kan fòlò u ka kow bëe la, sanni u k'a da mógo wèrèw kan.



"UNJM" sekretèri zenerali ka fòli la, kan in bëna kë sababu ye ka denmisènw ka baarako nògòya, n'u hakili lawèrèli ye bololabaara suguya caman si-ra kan.

A k'an sago ye Sufurulayi soba ka kë nafasòrlò yòrò ye, i n'a fò piyoniyew y'a kanu cogo min na, u ka lajèba 4 nan sen fè.

Sufurulayi kan ye teriya ni badenya taamashyèn fana ye Mali denmisènw n'a kèrèfè jamana taw ni nyögón cè.

bèe n'i miirinata

nyininkali

mun na abè fò ko bi denmisèn, o de ye sini mògòkòròba ye

mun na, a bè fò ko bi denmisèn, o de ye sini mògòkòròba ye ?

kalan de b'a to, bi denmisèn bè kè sini mògòkòròba ye, k'a d'a kan, denmisèn bè sini nyèsigi baaraw kalan.

o dé kama, mògò b'i to bi la ka sini nyèsigi. ni denmisèn min ma kalan, i ka sini tè nyè, i ka sini bè tinyè.

ala yèrè ye dinyè da kalan kama, k'a d'a kan, ala ye an ka baarakèminènw da, ka an fa Adama ladònniya o fèn bée la.

o la, dinyèlasigi baara fòlò de ye kalan ye. n'i denmisènnin min ma kalan, e ka mògòkòròbaya bè kè i komin sogo su, namaw ni wuluw bè taa min dun. o la sa, bée lajèlen ka kan ka kalan,

walasa an ka jamana bè taa nyè.

Mamadu Jara
Wolongotoba

*
* *

mun b'a to, an b'a fò ko bi denmisèn ye sini mògòkòròba ye ?

denmisènw tè to denmisènya la ten. don o don, dô bè ka fara u si kan. n'i ko "sini" don min, o dugusejè de ye sini ye. kun dô ka jan, wa mògò si man jan.

ni denmisènw ma jogo nyuman ta, u ma kalan, k'a sòrô u bè u ka denmisènya la, ni mògòkòrò bè bò dinyè na kelen kelen, denmisèn mèen o mèen, a bè kè mògòkòròba ye ; n'o y'a sòrô, jogo nyuman tè a la, o ye jamana seginnen ye kò.

o miseli filè nin ye : ni dutigi sara, k'a sòrô mògò sèbè tè a kò, i ka du bè tinyè.


ne b'a fò dentigi bée ye : "aw ka aw denw ladon konyuman, k'u don kalan na, k'u bila sira nyuman kan, k'u kalan baara nyuman bée la, baara min bè jamana taa nyè. i kèra jagokèla ye wo, i kèra cikèla ye wo, i kèra faamaba ye wo, i k'i den kalan i yèrè ka baara la fòlò, sanni ka kòròbay."

denmisèn ye bògù kènè ye ; n'a jara cogo min na, n'i ko i b'a yèlèma, a bè kari. o bè cogo min, denmisènw fana bè ten. e ye i den fili, a bè bajanyaala la dugu fan bée fè, e ma o jate, fo i si kòròbayalen, o y'a sòrô, i yèrè dèselèn don, i b'i sigi, k'i kun firifiri.

Mamadu Jakina Keyita
Karan



gakulu nkana nafaw



A bë san 10 bò, ja n'a masibaw kèra Mali ni saheli jamana wèrèw siginyögónw ye. Kabakolo ji binta dögbyara kosèbè. Mun nana ni sanji dögoya ye?

- Jiriw tigèli ka foro kúraw bò
- Dögów tigèli suman tobi kama

- Sojò jiriw tigèli.

Dögötigè cayara cogo dò la sisan, fo an ka dugubaw n'an ka dugumisènnin caman laminiw kèra kungo lankolonw ye.

N'an ye jateminè kè, an b'a ye k'a fò, k'an ka tobili dögò caya bë bò an ka tobili kécogo de la. Duguba fara dugumisèn kan, Mali muso fanba bée bée tobilikè ni dögò ye gakulu sabakan.

Gakulu saba in dun na, kòlòsili kèra k'a jira ko finyè bë don a fan bée ka tasuma funteni jènsèn.

Dögò hakè min bë jeni, o funteni hakè tè se daga ma O tuma, walasa dumuni ka tobi k'a nyè, fo dögò ka caya daga kòrò, o de bëna ni dögò tinyè ye.

Ni daga ye fila ye fana, wali daga kelen-kelen bée bée sigi a danma gakulu kan, wali daga fòlò bë jigin, ka filanan sigi o nè

na, o fana bë na ni dögò jenita cayali ye.

O bée témènen kò, ni gakulu saba in bë gabugu kònò, sisi bë bò, ka gabugu kònóna fa, o dun ye fèn ye min bë tobilikèla degun kosèbè.

Dögò tinyè in balili ka gèlèn n'an tora tobili la an ka gakulu saba kòrò in kan.

O de kòsòn, Mali musow ka kelenya tòn "UNFM" y'a hakilijakabò fèerèw kan, minnu bë se ka kè sababu ye, an ka gadomusow bolo, k'u ka tobilikò négoya.

O hukumu kònò, dònnikèlaw ye gakulu suguya dòw

dilan, minnu nafa ka bon sira caman kan, i n'a fò dögò tinyèli ani dò bòli an ka kungo jiriw tigèli la ani musow yèrè lafiyali tobili la, n'u bë wele ko gakulu nkanaw. O gakulu nkana dòw bë dilan ni nègè ye, dòw bë dilan ni bògo wali simon ye, ka sisiboyorò ni dögò donda k'u la.

"UNMF" nyémogòw y'a jira u ka lajèw bée sen fè, k'u haminankoba de ye gakulu nkanaw jènsènni ye jamana seleke naani bée la, k'a masorò jamana yiriwali si-ra dò don, min banbannen don ja n'a masibaw kèlèli kan. O tè nkalon ye, bawo ni dò bòra musow ka dögönyini na, u na se k'u nyèsin nafasorò wale wèrèw ma wa o témènen kò dò bë bò dögò songò la, barisa dögobolo hèrè tè don gakulu nkana kòrò.

O la sa, a nyinin don an balimamusow bée fè, u k'a lajè ka gakulu nikana dò bila u ka gakulu saba kòròlen nò na, u mana nafa min sòrò o wale la, o n'an ka fòlenw sèmèntiya, ka dò bò Mali musow ka kelenya tòn "UNFM" haminankow la.

